

N A C R T

Na osnovu člana 13. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine" broj: 49/06, 51/09) i članova 23. i 25. Statuta Općine Stari Grad Sarajevo – Prečišćeni tekst („Službene novine Kantona Sarajevo“, broj: 20/13), na 36. sjednici održanoj dana 30.04.2024.godine, Općinsko vijeće Stari Grad Sarajevo, donosi

ODLUKU

O USLOVIMA I POSTUPKU PRIHVATANJA ULAGANJA PRAVNIH LICA U IGRALIŠTA NA PODRUČJU OPĆINE STARI GRAD SARAJEVO

I – OPĆE ODREDBE

Član 1.

(Predmet Odluke)

Ovom Odlukom utvrđuju se uslovi i postupak prihvatanja ulaganja pravnih lica u igrališta na području Općine Stari Grad Sarajevo, putem javnog poziva i mogućnost isticanja brenda ili loga pravnog lica na igralištu.

II–OPĆI I POSEBNI KRITERIJI ZA PRIHVATANJE

Član 2.

(Kriteriji za prihvatanje ulaganja pravnih lica)

Kriteriji za prihvatanje ulaganja pravnih lica u igrališta na području Općine Stari Grad Sarajevo shodno odredbama ove Odluke utvrđuju se kao:

- opći kriteriji;
- posebni kriteriji.

Član 3.

(Opći kriteriji)

Opći kriteriji, koje pravna lica moraju ispuniti za prihvatanje ulaganja u igrališta na području Općine Stari Grad Sarajevo po raspisanom Javnom pozivu su sljedeći:

- da su osnovani i registrovani u Bosni i Hercegovini;
- da djelatnost kojom se bave ili proizvodi koje proizvode nisu zabranjeni za osobe mlađe od 18 (osamnaest) godina;
- da djelatnošću kojom se bave ili proizvodima koje proizvode ne vrijeđaju ljudska, vjerska, nacionalna ili druga prava građana.

Član 4.

(Posebni kriteriji)

- (1) Posebni kriteriji, koji se boduju na skali od 1 do 5, su:
- Tehnička saradnja i poslovanje vezano za područje Općine Stari Grad Sarajevo;
 - Ponudeni iznos ulaganja pravnih lica;
 - Idejno rješenje uređenja predmetnog igrališta.

III - JAVNI POZIV

Član 5.

(Javni poziv)

- (1) Odabir pravnih lica za prihvatanje ulaganja u igrališta na području Općine Stari Grad Sarajevo, vrši se putem javnog poziva, kojeg objavljuje Općinski načelnik putem Službe za lokalni razvoj.
- (2) Javni poziv iz stava (1) ovog člana ostaje otvoren 15 (petnaest) dana.
- (3) Javni poziv se objavljuje u jednom dnevnom listu i na internet stranici Općine Stari Grad Sarajevo.

Član 6.

(Sadržaj Javnog poziva)

- (1) Javni poziv obavezno sadrži:
- Naziv organa koji raspisuje poziv;
 - Spisak dokumentacije koja se obavezno dostavlja uz prijavu;
 - Aplikaciju za prijavu na Javni poziv;
 - Rok za prijavu na Javni poziv;
 - Naznaka da se na igralištu može istaći logo ili reklama pravnog lica čija finansijska ulaganja budu prihvaćena;
- (2) Sastavni dio Javnog poziva je aplikacija za prijavu na isti.

Član 7.

(Dokumentacija za prijavu na Javni poziv)

Uz popunjenu aplikaciju, koja je sastavni dio Javnog poziva, za prijavu na isti, aplikant je obavezan dostaviti sljedeću dokumentaciju:

- Rješenje o registraciji;
- Uvjerenje o poreskoj registraciji – identifikacioni broj;
- Izvještaj o urednom finansijskom poslovanju (bilans stanja, bilans uspjeha i narativni izvještaj za prethodnu godinu);
- Izjavu ovjerenu kod ovlaštenog organa u kojoj je navedeno kojom djelatnošću se bavi, kao i koje proizvode pravno lice proizvodi;
- Naznaku ponuđenog iznosa ulaganja pravnih lica;
- Idejno rješenje uređenja predmetnog igrališta;

- Dokaz o poslovanju ili tehničkoj saradnji na području Općine Stari Grad Sarajevo.

IV – KOMISIJA ZA POSTUPANJE PO APLIKACIJAMA NA JAVNI POZIV

Član 8.

(Komisija)

- (1) Općinski načelnik prije raspisivanja Javnog poziva iz člana 6. ove Odluke, imenuje Komisiju za postupanje po aplikacijama na Javni poziv za prihvatanje ulaganja pravnih lica u igrališta na području Općine Stari Grad Sarajevo (u daljem tekstu: Komisija).
- (2) Komisija broji 5 (pet) članova, od kojih je jedan predsjednik Komisije. Komisiju čine 3 (tri) člana koji su državni službenici i 2 (dva) člana koji su predstavnici Općinskog vijeća Stari Grad Sarajevo.
- (3) Komisija ima zadatak da :
 - Pregleda sve aplikacije sa dostavljenom dokumentacijom;
 - Aplikacije uz koje nije dostavljena obavezna dokumentacija iz člana 7. ove Odluke, odbacuje kao da nisu ni podnesene i o istom obavještava aplikanta pismenim putem;
 - Aplikacije koje ispunjavaju opće i posebne kriterije utvrđene ovom Odlukom dostavlja Općinskom načelniku na dalje postupanje uz preporuku da li da odobri prihvatanje ulaganja pravnih lica u igrališta na području Općine Stari Grad Sarajevo.

V – ODLUKA O PRIHVATANJU

Član 9.

(Odluka o prihvatanju)

Općinski načelnik na osnovu preporuke Komisije iz člana 8. ove Odluke donosi akt kojim odlučuje o prihvatanju ulaganja pravnih lica u igrališta na području Općine Stari Grad Sarajevo, te odobravanju isticanja loga ili reklame pravnog lica, čija se finansijska sredstva prihvataju.

Član 10.

(Ugovor sa korisnicima finansijskih sredstava)

Općinski načelnik po osnovu akta iz člana 9. ove Odluke, zaključuje ugovor sa pravnim licem o prihvatanju ulaganja pravnih lica u igrališta na području Općine Stari Grad Sarajevo po osnovu javnog poziva, kojim će biti detaljno uređena prava i obaveze ugovornih strana uz posebnu naznaku da sva ulaganja u igrališta moraju biti u skladu sa relevantnim zakonskim i podzakonskim aktima sa aspekta tehničkih uvjeta.

VI - PRELAZNE I ZAVRŠNE ODREDBE

Član 11.

(Stupanje na snagu Odluke)

Ova Odluka stupa na snagu osmog dana od dana objavljivanja u Službenim novinama Kantona Sarajevo.

**PREDSJEDAVAJUĆI
OPĆINSKOG VIJEĆA STARI GRAD**

SARAJEVO

Seid Škaljić

Broj:

Datum:

O B R A Z L O Ž E N J E

I - PRAVNI OSNOV

Pravni osnov donošenja ove Odluke sadržan je u odredbama člana 13. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine" broj: 49/06, 51/09), kojima su utvrđene nadležnosti Općinskog vijeća, dok je članovima 23. i 25. Statuta Općine Stari Grad Sarajevo – Prečišćeni tekst („Službene novine Kantona Sarajevo“, broj: 20/13), utvrđeno da je za donošenje propisa i akata u okviru prava i dužnosti Općine nadležno Općinsko vijeće.

II - RAZLOZI DONOŠENJA

Uvažavajući da na području Općine Stari Grad Sarajevo nedostaju igrališta koja bi ispunjavala standarde neophodne za adekvatno korištenje istih od strane djece, a da su sredstva u Budžetu Općine nedostatna da bi se odgovorilo potrebna i zahtjevima građana u pogledu uređenih i opremljenih igrališta predložena je ova Odluka.

Cijeneći transparentnost i ekonomičnost predviđen je javni poziv, kao i uvjeti koje mora ispuniti pravno lice za prihvatanja ulaganja pravnih lica u igrališta na području Općine Stari Grad Sarajevo.

III – OBRAZLOŽENJE

Odlukom je predviđeno ukupno šest poglavlja, na način kako slijedi:

I – OPĆE ODREDBE

II– OPĆI I POSEBNI KRITERIJI ZA PRIHVATANJE

III - JAVNI POZIV

IV – KOMISIJA ZA POSTUPANJE PO APLIKACIJAMA NA JAVNI POZIV

V – ODLUKA O PRIHVATANJU

VI - PRELAZNE I ZAVRŠNE ODREDBE

IV - FINANSIJSKA SREDSTVA

Za provođenje procedure usvajanja ove Odluke nisu potrebna finansijska sredstva, dok su za realizaciju iste potrebna finansijska sredstva koja je potrebno predvidjeti u Budžetu Općine.

Predlagač:

Općinski načelnik putem

Stručne službe kabineta Općinskog načelnika